

ZAKON O LIZINGU

-Neslužbeni prečišćeni tekst-
("Službene novine Federacije BiH", br. 85/08, 39/00, 65/13 i 104/16)

DIO PRVI - UVODNE ODREDBE

Član 1.

Oblast primjene Zakona

- (1) Ovim Zakonom uređuju se: uvjeti za osnivanje, poslovanje i prestanak rada lizing društva, ugovor o lizingu, prava i obaveze subjekata u poslovima lizinga, prestanak ugovora o lizingu, registracija vlasničkih i drugih prava nad predmetom lizinga, upravljanje rizicima, finansijsko izvještavanje i nadzor nad poslovanjem lizing društva.
- (2) Na lizing društva i odnose koji proizlaze iz poslova lizinga primjenjuju se odredbe drugih propisa samo u slučajevima koje ovaj Zakon ne uređuje.

Član 2.

Definicije

Pojedini izrazi koji se koriste u ovom Zakonu imaju sljedeća značenja:

- a) "Agencija" - Agencija za bankarstvo Federacije Bosne i Hercegovine,
- b) "Akontacijska naknada" - iznos unaprijed plaćene lizing naknade kod operativnog lizinga kojom se umanjuje obaveza za ukupnu lizing naknadu,
- c) "Lizing naknada"- je novčani iznos koji plaća korisnik lizinga na osnovu posjedovanja i korištenja predmeta lizinga,
- d) "Predmet lizinga" - je pokretna ili nepokretna stvar u skladu sa propisima koji uređuju vlasništvo, odnosno druga stvarna prava, a može biti i buduća stvar,
- e) "Podružnica" - organizacioni dio lizing društva koja nema svojstvo pravnog lica, ali može obavljati sve poslove u okviru djelatnosti društva upisane u sudski registar i pri tome sticati prava i preuzimati obaveze u ime i za račun društva,
- f) "Registar zaloga" - registar zaloga nad pokretnim stvarima u Bosni i Hercegovini,
- g) "Značajan vlasnički interes" - bilo koji vlasnički udio pravnog ili fizičkog lica koje posjeduje više od 10% kapitala lizing društva ili drugog pravnog lica.

Član 3.

Lizing društvo

- (1) Lizing društvo je pravno lice sa sjedištem u Federaciji Bosne i Hercegovine (u daljnjem tekstu: Federacija) koje je upisano u sudski registar na osnovu dozvole za obavljanje poslova lizinga izdate od Agencije.
- (2) Lizing društvo ne može se upisati u sudski registar prije dobijanja dozvole iz stava (1) ovog člana.
- (3) Lizing društvo može biti osnovano kao dioničko društvo, ili kao društvo sa ograničenom odgovornošću.
- (4) Niko ne može u nazivu firme ili u pravnom prometu koristiti riječ "lizing", odnosno izvedenice te riječi bez saglasnosti Agencije.
- (5) Lizing društvo ne smije u nazivu sadržavati riječ "banka", odnosno izvedenice te riječi bez saglasnosti Agencije.

Član 4.

Subjekti u poslovima lizinga

- (1) Subjekti u poslovima lizinga su davalac lizinga, korisnik lizinga i dobavljač predmeta lizinga.

- (2) Davalac lizinga je pravno lice sa sjedištem u Federaciji registrirano za obavljanje poslova lizinga.
- (3) Korisnik lizinga je svako lice koje na osnovu ugovora o lizingu stiče pravo posjedovanja i korištenja predmeta lizinga.
- (4) Dobavljač predmeta lizinga je svako lice koje na osnovu ugovora ili na drugi zakonom propisan način na davaoca lizinga prenosi pravo vlasništva nad predmetom lizinga, osim ako dobavljač predmeta lizinga i davalac lizinga nisu ista lica.
- (5) Davalac lizinga i dobavljač predmeta lizinga može biti isto lice.

Član 5.

Poslovi lizinga

- (1) Lizing je pravni posao u kojem davalac lizinga prenosi pravo posjedovanja i korištenja predmeta lizinga na korisnika lizinga na određeni vremenski rok, a zauzvrat korisnik lizinga se obavezuje da mu za to plaća ugovorenu lizing naknadu.
- (2) Posao lizinga iz stava (1) ovog člana, s obzirom na svoja obilježja, može biti posao finansijskog lizinga i posao operativnog lizinga.
- (3) Finansijski lizing je pravni posao iz stava (1) ovog člana u kojem korisnik lizinga u periodu posjedovanja i korištenja predmeta lizinga plaća ugovorenu lizing naknadu sa opcijom kupovine i sticanja prava vlasništva nad predmetom lizinga i snosi troškove amortizacije predmeta lizinga.
- (4) Operativni lizing je pravni posao iz stava (1) ovog člana u kojem korisnik lizinga u periodu posjedovanja i korištenja predmeta lizinga plaća davaocu lizinga određenu naknadu bez opcije kupovine i sticanja prava vlasništva nad predmetom lizinga, a davalac lizinga snosi troškove amortizacije predmeta lizinga.
- (5) S obzirom na položaj i broj subjekata u poslu lizinga, lizing može biti direktni lizing, indirektni lizing i povratni lizing (sale and lize back).
- (6) Direktni lizing je dvostrani pravni posao u kojem učestvuju samo dva subjekta, davalac lizinga koji je ujedno i dobavljač predmeta lizinga i korisnik lizinga.
- (7) Indirektni lizing je višestrani pravni posao u kojem učestvuju tri subjekta, dobavljač predmeta lizinga, davalac lizinga i korisnik lizinga.
- (8) Povratni lizing (sale and lize back) je pravni posao u kojem učestvuju samo korisnik lizinga i davalac lizinga, pri čemu korisnik lizinga prethodno u svojstvu dobavljača predmeta lizinga prodaje predmet lizinga davaocu lizinga kojeg potom davalac lizinga predaje na korištenje korisniku lizinga, uz obavezu korisnika lizinga na plaćanje naknade.

Član 5a.

Na pitanja zaštite korisnika po ugovorima o operativnom lizingu primjenjuju se propisi kojima se uređuje zaštita potrošača i obligacioni odnosi, kao i podzakonski akti Agencije.

Član 6.

Obavljanje poslova lizinga

- (1) Poslove lizinga na teritoriji Federacije može obavljati samo:
 - a) lizing društvo iz člana 3. ovog Zakona,
 - b) podružnica lizing društva koje ima sjedište u Republici Srpskoj i Brčko Distriktu Bosne i Hercegovine (u daljnjem tekstu: Brčko Distrikt).
- (2) Izuzetno od odredbe stava (1) ovog člana, poslove finansijskog lizinga može obavljati banka sa sjedištem u Federaciji, odnosno organizacioni dio banke na teritoriji Federacije čije je sjedište u Republici Srpskoj i Brčko Distriktu, uz uvjete i na način određen propisima koji uređuju poslovanje banaka na području Federacije Bosne i Hercegovine.
- (3) Na lica iz stava (2) ovog člana koja obavljaju poslove finansijskog lizinga primjenjuju se odredbe ovog Zakona koje uređuju:
 - a) ugovor o lizingu,
 - b) prava i obaveze,

- c) registraciju lizinga,
- d) prekršaje banaka.

DIO DRUGI - UVJETI ZA OSNIVANJE, POSLOVANJE I PRESTANAK RADA

POGLAVLJE I DJELATNOST I KAPITAL

Član 7.

Djelatnost lizing društva

- (1) Lizing društvo smije obavljati samo poslove iz člana 5. ovog Zakona.
- (2) Izuzetno od odredbe stava (1) ovog člana, lizing društvo može obavljati i druge poslove koji su u neposrednoj ili posrednoj vezi sa poslovima lizinga.
- (3) Poslovima iz stava (2) ovog člana smatraju se zakup, posredovanje kod prodaje, odnosno prodaja predmeta koji pripadaju lizing društvu na osnovu obavljanja poslova lizinga.
- (4) Lizing društvo ne smije primati depozite, odobravati kredite i zajmove.

Član 8.

Osnovni kapital lizing društva

- (1) Minimalan iznos osnovnog kapitala lizing društva iznosi 250.000,00 KM i u cijelosti mora biti uplaćen u novcu prije upisa osnivanja ili upisa povećanja osnovnog kapitala lizing društva u sudski registar.
- (2) Sredstva osnovnog kapitala lizing društva ne mogu biti opterećena na bilo koji način niti potjecati iz kredita za druge namjene.
- (3) Izuzetno, odredbe stava (2) ovog člana ne primjenjuju se u slučaju spajanja ili pripajanja lizing društva, odnosno u slučaju podjele lizing društva.
- (4) Minimalni iznos osnovnog kapitala koji lizing društvo mora da održava ne može biti manji od iznosa utvrđenog u stavu (1) ovog člana.

POGLAVLJE II VLASNIČKI INTERESI

Član 9.

Sticanje značajnog vlasničkog interesa u lizing društvu

- (1) Fizičko ili pravno lice ne može steći ili povećati značajan vlasnički interes u lizing društvu više od 10%, 20%, 33% ili 50% bez prethodne saglasnosti Agencije.
- (2) Saglasnost iz stava (1) ovog člana prestaje važiti ako lice u roku od šest mjeseci od dana izdavanja saglasnosti za sticanje značajnog vlasničkog interesa ne stekne poslovni udjel ili dionice na koje se saglasnost odnosi.
- (3) Lice koje stekne ili poveća značajan vlasnički interes u suprotnosti sa odredbom stava (1) ovog člana, nema pravo glasa odnosno učestvovanja u upravljanju lizing društvom na osnovu poslovnog udjela ili dionica koje je pribavilo na taj način.
- (4) Pravo glasa iz stava (3) ovog člana, za vrijeme dok sticatelj značajnog vlasničkog interesa nema pravo glasa, pribraja se pravu glasa drugih vlasnika poslovnih udjela ili dionica lizing društva srazmjerno njihovom udjelu u osnovnom kapitalu lizing društva, a sticatelj značajnog vlasničkog interesa učestvuje u glasanju samo sa poslovnim udjelom ili dionicama koje nije stekao u suprotnosti sa odredbom stava (1) ovog člana.

Član 10.

Saglasnost za sticanje značajnog vlasničkog interesa u lizing društvu

- (1) Uz zahtjev za izdavanje saglasnosti iz člana 9. stav (1) ovog Zakona lizing društvo prilaže dokumentaciju u skladu sa posebnim propisima Agencije.
- (2) Agencija je dužna da se o zahtjevu za izdavanje saglasnosti za sticanje značajnog vlasničkog interesa izjasni u roku od 30 dana od dana prijema urednog zahtjeva.

Član 11.

Saglasnost za sticanje vlasničkog interesa u drugom pravnom licu

- (1) Lizing društvo ne može bez prethodne saglasnosti Agencije steći vlasnički interes u drugom pravnom licu ako on prelazi iznos od 5% osnovnog kapitala lizing društva.
- (2) Ukupni vlasnički interesi koje lizing društvo može imati u drugim pravnim licima ne mogu preći 25% osnovnog kapitala lizing društva.
- (3) Uz zahtjev za izdavanje saglasnosti iz stava (1) ovog člana lizing društvo prilaže dokumentaciju u skladu sa posebnim propisima Agencije.
- (4) Agencija je dužna da se o zahtjevu iz stava (1) ovog člana izjasni u roku od 30 dana od dana prijema urednog zahtjeva.

POGLAVLJE III IZDAVANJE I ODUZIMANJE DOZVOLE

Član 12.

Dozvola za obavljanje poslova lizinga

- (1) Agencija izdaje dozvolu za obavljanje poslova lizinga lizing društvu iz člana 3. ovog Zakona.
- (2) Lizing društvo dužno je, uz zahtjev za izdavanje dozvole iz stava (1) ovog člana, priložiti:
 - a) osnivački akt koji ne mora biti sačinjen u formi notarski obrađene isprave,
 - b) statut koji ne mora biti sačinjen u formi notarski obrađene isprave,
 - c) plan poslovanja za prve tri poslovne godine koji sadrži projekciju bilansa stanja i bilansa uspjeha,
 - d) popis osnivača lizing društva u kojem su navedeni svi identifikacijski podaci osnivača i njihov udio u osnovnom kapitalu,
 - e) popis supsidijarnih društava sa tačnim navođenjem rokova do kojih će se okončati sklopljeni ugovori na osnovu kojih se ona bave poslovima finansijskog i operativnog lizinga,
 - f) ostalu dokumentaciju u skladu sa posebnim propisima Agencije.
- (3) Dozvola iz stava (1) ovog člana izdaje se na neodređeno vrijeme i nije prenosiva.

Član 13.

Izdavanje dozvole za obavljanje poslova lizinga

Agencija je dužna u roku od 60 dana od dana prijema urednog zahtjeva iz člana 12. ovog Zakona izdati dozvolu ili odbiti zahtjev.

Član 14.

Odbijanje zahtjeva za izdavanje dozvole za obavljanje poslova lizinga

Agencija će odbiti zahtjev za izdavanje dozvole za obavljanje poslova lizinga:

- a) ako iz osnivačkog akta i druge dokumentacije lizing društva proizilazi da lizing društvo ne ispunjava uvjete propisane ovim Zakonom i posebnim propisima Agencije,
- b) ako su odredbe osnivačkog akta lizing društva u suprotnosti sa odredbama ovog Zakona.

Član 15.

Oduzimanje dozvole za obavljanje poslova lizinga

(1) Agencija će rješenjem oduzeti dozvolu za obavljanje poslova lizinga ako:

- a) lizing društvo podnese zahtjev za oduzimanje dozvole.
- b) lizing društvo ne počne poslovati u roku od godinu dana od dana izdavanja dozvole za obavljanje poslova lizinga,
- c) lizing društvo ne obavlja poslove lizinga u periodu dužem od godinu dana,
- d) lizing društvo prestane ispunjavati uvjete na osnovu kojih je dobilo dozvolu za obavljanje poslova lizinga,

- e) je lizing društvo dobilo dozvolu za obavljanje poslova lizinga na osnovu neistinite dokumentacije i podataka kojima je Agencija dovedena u zabludu,
 - f) lizing društvo onemogućiti Agenciji vršenje nadzora nad svojim poslovanjem,
 - g) lizing društvo u roku utvrđenom aktom Agencije ne postupi po nalogu za otklanjanje nezaklonosti i nepravilnosti u svom poslovanju.
- (2) Rješenje iz stava (1) ovog člana Agencija je dužna dostaviti lizing društvu u roku od osam dana od dana njegovog donošenja.
- (3) Lizing društvo ne smije sklapati nove poslove u vezi sa obavljanjem poslova lizinga od dana dostave rješenja iz stava (1) ovog člana, osim onih poslova kojima se osigurava prestanak lizing društva na način određen ovim Zakonom.
- (4) Rješenje iz stava (1) ovog člana Agencija je dužna objaviti u "Službenim novinama Federacije BiH" i dostaviti ga nadležnom sudu u svrhu pokretanja likvidacionog postupka, najkasnije u roku od 15 dana od dana njegovog dostavljanja lizing društvu.

Član 15a

Prestanak poslovanja lizing društva

- (1) Lizing društvo može donijeti odluku o prestanku poslovanja kao lizing društvo i preregistrovati se kao drugo privredno društvo pod uvjetom da u portfoliju nema važećih ugovora o lizingu ili pod uvjetom da na drugo lizing društvo prenese svoje lizing poslovanje.
- (2) Lizing društvo iz stava (1) ovog člana dužno je, prije upisa odluke o promjeni predmeta poslovanja u sudski registar, dobiti rješenje Agencije o ukidanju dozvole za obavljanje poslova lizinga.
- (3) Agencija će donijeti rješenje o ukidanju dozvole kada, uz druge uvjete potrebne za prestanak poslovanja lizing društva, utvrdi da su ispunjeni uvjeti iz stava (1) ovog člana.
- (4) Ako lizing društvo donese odluku o prestanku poslovanja kao lizing društvo, a u portfoliju ima važećih ugovora o lizingu i u roku od šest mjeseci nije na drugo lizing društvo prenijelo svoje lizing poslovanje, Agencija će postupiti na način iz člana 85. stav (3) ovog Zakona. Lizing društvo ostaje pod nadzorom Agencije sve do okončanja procesa prijenosa portfolija na drugo lizing društvo ili do pokretanja postupka likvidacije od strane nadležnog suda.
- (5) U slučaju prijenosa lizing poslovanja iz stava (1) ovog člana lizing društva koja učestvuju u tom postupku dužna su o toj namjeri u pisanoj formi obavijestiti Agenciju, obaviti prethodne konsultacije s Agencijom, te dobiti saglasnost Agencije za taj prijenos.

Član 16.

Rješenje Agencije

Rješenje Agencije iz čl. 12., 14. i 15. ovog Zakona je konačno i protiv njega se može pokrenuti upravni spor.

POGLAVLJE IV OSNIVANJE PODRUŽNICA

Član 17.

Osnivanje podružnica lizing društva sa sjedištem u Federaciji

- (1) Lizing društvo sa sjedištem u Federaciji može obavljati poslove lizinga u Republici Srpskoj i Brčko Distriktu osnivanjem podružnice u skladu sa ovim Zakonom i propisima Republike Srpske i Brčko Distrikta.
- (2) Lizing društvo iz stava (1) ovog člana dužno je Agenciji podnijeti zahtjev za izdavanje saglasnosti za osnivanje podružnice u Republici Srpskoj i Brčko Distriktu.
- (3) Uz zahtjev iz stava (2) ovog člana lizing društvo mora priložiti:
- a) odluku o osnivanju podružnice,
 - b) naziv i adresu podružnice,
 - c) imena lica ovlaštenih za vođenje podružnice,
 - d) poslovni plan podružnice za naredne tri godine,

e) ostalu dokumentaciju u skladu sa posebnim propisom Agencije.

(4) Agencija je dužna da se o zahtjevu iz st. (2) i (6) ovog člana izjasni u roku od 30 dana od dana prijema urednog zahtjeva.

(5) Lizing društvo iz stava (1) ovog člana dužno je obratiti se zahtjevom za osnivanje podružnice i nadležnom organu Republike Srpske i Brčko Distrikta u roku od 30 dana od dana izdavanja saglasnosti iz stava (2) ovog člana.

(6) Lizing društvo iz stava (1) ovog člana može obavljati poslove i putem podružnice u Federaciji i dužno je za izdavanje saglasnosti za njeno osnivanje podnijeti zahtjev Agenciji zajedno sa dokumentacijom iz stava (3) ovog člana.

Član 18.

Osnivanje podružnica lizing društva sa sjedištem u Republici Srpskoj i Brčko Distriktu

(1) Lizing društvo sa sjedištem u Republici Srpskoj odnosno Brčko Distriktu može obavljati poslove lizinga na području Federacije osnivanjem podružnica u Federaciji.

(2) Lizing društvo iz stava (1) ovog člana dužno je Agenciji podnijeti zahtjev za izdavanje saglasnosti za osnivanje podružnica na području Federacije.

(3) Uz zahtjev za izdavanje saglasnosti iz stava (2) ovog člana lizing društvo mora priložiti dokumentaciju iz člana 17. stav (3) ovog Zakona, te saglasnost nadležnog organa Republike Srpske odnosno Brčko Distrikta.

(4) Agencija je dužna da se o zahtjevu iz stava (2) ovog člana izjasni u roku od 30 dana od dana prijema urednog zahtjeva.

Član 19.

Oduzimanje izdate saglasnosti

Agencija može oduzeti izdatu saglasnost za osnivanje podružnice lizing društvu iz člana 17. stav (1) i člana 18. stav (1) ovog Zakona u slučajevima i po postupku propisanim posebnim propisima Agencije.

POGLAVLJE V UPRAVLJANJE

Član 20.

Organi lizing društva

Organi lizing društva su:

- a) skupština,
- b) nadzorni odbor,
- c) uprava.

Član 21.

Primjena drugih zakona

Na sve što nije regulirano ovim Zakonom za organe lizing društva primjenjuju se odredbe Zakona o privrednim društvima.

Član 22.

Skupština

(1) Skupštinu lizing društva čine dioničari odnosno članovi društva.

(2) Skupština obavezno odlučuje o godišnjem obračunu, raspodjeli dobiti i pokriću gubitka, o izboru članova nadzornog odbora, te o drugim pitanjima propisanim zakonom i statutom lizing društva.

Član. 23.

Nadzorni odbor lizing društva

(1) Lizing društvo mora imati nadzorni odbor.

- (2) Nadzorni odbor lizing društva sastoji se od najmanje tri člana.
- (3) Osnivačkim aktom i statutom lizing društva može se odrediti da nadzorni odbor ima više članova, ali njihov broj mora biti neparan.

Član 24.

Članovi nadzornog odbora lizing društva

Član nadzornog odbora lizing društva ne može biti lice koje:

- a) ima značajan vlasnički interes u drugom lizing društvu ili u pravnom licu u kojem lizing društvo ima više od 5% vlasničkog interesa u njihovom osnovnom kapitalu,
- b) član nadzornog odbora ili uprave u drugom lizing društvu ili mikrokreditnoj organizaciji,
- c) član nadzornog odbora ili član uprave banke, osim ako banka ima više od 50% vlasništva u lizing društvu ili su lizing društvo i banka članovi iste grupacije.

Član 25.

Uvjeti za člana nadzornog odbora lizing društva

Član nadzornog odbora lizing društva može biti lice koje:

- a) ispunjava uvjete za člana nadzornog odbora u skladu sa Zakonom o privrednim društvima,
- b) nije bilo član uprave ili nadzornog odbora društva nad kojim je pokrenut postupak stečaja u periodu od jedne godine prije uvođenja te mjere.

Član 26.

Nadležnost nadzornog odbora lizing društva

Osim nadležnosti koje nadzorni odbor ima u skladu sa Zakonom o privrednim društvima, nadzorni odbor lizing društva:

- a) daje smjernice upravi za utvrđivanje poslovne politike lizing društva,
- b) daje smjernice upravi za izradu finansijskog plana lizing društva,
- c) daje smjernice upravi za uvođenje sistema internih kontrola,
- d) odlučuje o drugim poslovima određenim ovim Zakonom.

Član 27.

Dužnosti članova nadzornog odbora lizing društva

Članovi nadzornog odbora lizing društva dužni su:

- a) raspravljati o činjenicama koje je utvrdila Agencija i druga nadzorna tijela tokom postupka nadzora nad lizing društvom,
- b) utvrđivati revidirane finansijske izvještaje lizing društva i o tome sastaviti pisani izvještaj skupštini,
- c) razriješiti člana uprave koji iz bilo kojeg razloga prestane obavljati poslove i istovremeno imenovati novog člana uprave.

Član 28.

Razrješenje člana nadzornog odbora

Agencija može zatražiti sazivanje skupštine lizing društva i predložiti razrješenje člana nadzornog odbora ako:

- a) su prekršene odredbe čl. 24. i 25. ovog Zakona,
- b) član nadzornog odbora ne postupa u skladu sa članom 27. ovog Zakona.

Član 29.

Uprava lizing društva

- (1) Upravu lizing društva čine direktor i najmanje jedan izvršni direktor.
- (2) Najmanje jedan član uprave lizing društva mora biti državljanin Bosne i Hercegovine.
- (3) Najmanje jedan član uprave lizing društva mora znati jedan od jezika u službenoj upotrebi u Federaciji.

- (4) Najmanje jedan član uprave mora imati prebivalište u Federaciji.
- (5) Članovi uprave lizing društva moraju biti u radnom odnosu u lizing društvu na puno radno vrijeme.
- (6) U skladu sa osnivačkim aktom ili statutom društvo može dati prokuru jednom ili više fizičkih lica za zastupanje lizing društva, odnosno sklapanje ugovora i poduzimanje pravnih radnji u ime i za račun lizing društva koje proizlaze iz djelatnosti lizing društva, ali samo zajedno sa barem jednim članom uprave lizing društva.
- (7) Uvjeti koje treba ispunjavati lice kojem se daje prokura, ovlašteno tijelo za dodjelu prokure, vrsta i način davanja prokure, obim, ovlaštenja iz prokure, uključujući i ograničenja u poduzimanju radnji od strane prokurista, utvrđuju se osnivačkim aktom lizing društva.

Član 30.

Uvjeti za člana uprave lizing društva

- (1) Član uprave lizing društva može biti lice koje ispunjava sljedeće uvjete:
 - a) ima visoku školsku spremu,
 - b) ima odgovarajuće stručne kvalifikacije, sposobnost i iskustvo potrebno za vođenje poslova društva,
 - c) nije član uprave ili nadzornog odbora drugog lizing društva u Federaciji, niti je prokurista u nekom drugom pravnom licu,
 - d) nije bilo član uprave ili nadzornog odbora društva nad kojim je pokrenut postupak stečaja u periodu od jedne godine prije uvođenja te mjere,
 - e) za koje je na osnovu dosadašnjeg ponašanja moguće opravdano zaključiti da će odgovorno i savjesno obavljati poslove člana uprave lizing društva;
 - f) nije bilo razriješeno dužnosti člana uprave lizing društva po nalogu Agencije iz člana 83. stav (2) ovog Zakona;
 - g) ima dobar ugled i nad čijom imovinom ne postoji upisan teret od strane nadležnog organa;
 - h) nije pravosnažno osuđeno za prekršaj ili krivično djelo koje predstavlja grubo i trajno kršenje propisa iz djelatnosti Agencije ili drugog nadležnog tijela na finansijskom tržištu i
 - i) ispunjava ostale uvjete za člana uprave u skladu sa Zakonom o privrednim društvima.
- (2) Pod stručnim kvalifikacijama i iskustvom iz stava (1) tačka b) ovog člana podrazumijeva se najmanje dvogodišnje iskustvo na poslovima lizinga, odnosno najmanje trogodišnje iskustvo na poslovima u drugim finansijskim institucijama.

Član 30a.

Saglasnost za obavljanje funkcije člana uprave lizing društva

- (1) Članom uprave lizing društva može biti imenovano samo lice koje od Agencije dobije saglasnost za obavljanje funkcije člana uprave lizing društva.
- (2) Zahtjev za izdavanje saglasnosti iz stava (1) ovog člana podnosi kandidat za člana uprave lizing društva uz obavezno priloženu odluku u pisanoj formi ili suglasnost organa u lizing društvu nadležnog za imenovanje članova uprave za mandat koji ne može biti duži od četiri godine.
- (3) U postupku odlučivanja o prethodnoj saglasnosti, Agencija izdaje prethodnu saglasnost iz stava (1) ovog člana na rok predloženog trajanja mandata.
- (4) Zahtjevu iz stava (2) ovog člana moraju se priložiti dokazi o ispunjavanju uvjeta iz člana 30. ovog Zakona.
- (5) U postupku odlučivanja o prethodnoj saglasnosti iz stava (1) ovog člana, Agencija može zatražiti da kandidat za člana uprave lizing društva predstavi program vođenja poslova lizing društva za razdoblje mandata na koje se imenuje član uprave.
- (6) Lice koje je dobilo saglasnost Agencije za obavljanje funkcije člana uprave lizing društva prije imenovanja na funkciju člana uprave drugog lizing društva mora ponovno dobiti saglasnost Agencije.
- (7) Kada nadležni organ lizing društva želi ponovno imenovati lice koje je već dobilo saglasnost za obavljanje funkcije člana uprave lizing društva, kandidat za člana uprave lizing društva uz

priloženu odluku u pisanoj formi ili saglasnost organa u lizing društvu nadležnog za imenovanje člana uprave dužan je Agenciji podnijeti zahtjev za izdavanje saglasnosti iz stava (2) ovog člana za novi mandat najmanje tri mjeseca prije isteka mandata člana uprave.

(8) Lice koje je već dobilo saglasnost za obavljanje funkcije člana uprave lizing društva i koje nadležni organ lizing društva želi ponovo imenovati dužno je ponovo proći postupak propisan ovim Zakonom.

Član 30b.

Odbijanje zahtjeva za izdavanje saglasnosti za obavljanje funkcije člana uprave lizing društva

Agencija će rješenjem odbiti zahtjev za izdavanje saglasnosti za obavljanje funkcije člana uprave lizing društva ako:

- a) predloženo lice ne ispunjava uvjete propisane odredbama člana 30. ovog Zakona,
- b) Agencija raspolaže objektivnim i dokazivim razlozima zbog kojih se može pretpostaviti da bi djelatnosti i poslovi kojima se lice bavi ili se bavilo, predstavljali prijetnju upravljanju lizing društvom u skladu s pravilima o upravljanju rizicima, organizacionim i drugim zahtjevima iz ovog Zakona, kao i druge zakonske i podzakonske regulative,
- c) su u zahtjevu za izdavanje saglasnosti navedeni podaci netačni, neistiniti ili podaci koji dovode u zabludu.

Član 30c.

Oduzimanje saglasnosti za obavljanje funkcije člana uprave lizing društva

(1) Agencija će rješenjem oduzeti saglasnost za obavljanje funkcije člana uprave lizing društva ako:

- a) lice u roku od šest mjeseci od dana izdavanja saglasnosti za obavljanje funkcije člana uprave ne bude imenovano i ne stupi na dužnost člana uprave lizing društva na koje se saglasnost odnosi, a postupak izdavanja saglasnosti je bio spojen s postupkom izdavanja odobrenja za obavljanje poslova lizinga,
- b) lice u roku od tri mjeseca od izdavanja saglasnosti za obavljanje funkcije člana uprave ne bude imenovano i ne stupi na dužnost člana uprave lizing društva,
- c) licu prestaje funkcija člana uprave lizing društva na koju se saglasnost odnosi,
- d) licu prestane radni odnos s lizing društvom na koje se saglasnost odnosi, s danom prestanka radnog odnosa, odnosno istekom mandata člana uprave na koji se saglasnost odnosi,
- e) član uprave ne ispunjava uvjete pod kojim mu je saglasnost izdata,
- f) je saglasnost izdata uslijed prešućivanja bitnih činjenica ili na temelju neistinitih, netačnih podataka i podataka koji dovode u zabludu, odnosno na neki drugi nepropisan način,
- g) je član uprave lizing društva ozbiljno i sistemski kršio ovaj Zakon, propise donesene na osnovu ovog Zakona i druge zakonske propise, a naročito ako je zbog toga ugrožena likvidnost ili održavanje kapitala lizing društva,
- h) član uprave nije osigurao provođenje ili nije proveo nadzorne mjere koje je naložila Agencija,
- i) član uprave nije osigurao adekvatnu organizacionu strukturu ili sistem upravljanja rizicima lizing društva,
- j) su prestali postojati uvjeti iz odredbi propisa o privrednim društvima za člana uprave,
- k) se utvrdi da je član uprave u sukobu interesa zbog kojeg ne može ispunjavati obaveze i dužnosti sa pažnjom urednog i savjesnog privrednika,
- l) član uprave redovno ne ispunjava obavezu utvrđivanja i ocjenjivanja efikasnosti politika, mjera i internih procedura vezanih za usklađenost lizing društva s ovim Zakonom ili obavezu poduzimanja odgovarajućih mjera u cilju ispravljanja nedostataka, odnosno nepravilnosti u poslovanju lizing društva.

(2) Izuzetno, u slučajevima iz stava (1), tač. h), i), k) i l) ovog člana, Agencija može umjesto oduzimanja rješenja donijeti rješenje kojim će privremeno zabraniti obavljanje funkcije člana uprave lizing društva.

Član 30d.

Pravne posljedice oduzimanja saglasnosti za obavljanje funkcije člana uprave lizing društva

- (1) Ako Agencija oduzme saglasnost za obavljanje funkcije člana uprave, lizing društvo obavezno je bez odgode donijeti odluku o opozivu imenovanja tog člana uprave.
- (2) Ako je članu uprave oduzeta saglasnost za obavljanje funkcije člana uprave ili u drugim slučajevima prijevremenog prestanka mandata člana uprave, nadležni organ prema osnivačkom aktu lizing društva dužan je u roku od 90 dana od dana prestanka funkcije člana, odnosno članova uprave pribaviti saglasnost Agencije i imenovati novog člana, odnosno nove članove uprave, ako lizing društvo ne bi imalo minimalan broj članova uprave u skladu s osnivačkim aktom i/ili ovim Zakonom.
- (3) Agencija objedinjuje oba postupka ako je protiv člana uprave započeo postupak za oduzimanje saglasnosti za člana uprave u slučaju iz člana 30c. stav (1) tačka g) ovog Zakona, a zbog kojeg je protiv lizing društva započet postupak za oduzimanje odobrenja za obavljanje poslova lizinga.
- (4) U slučaju kada uprava lizing društva nije u punom sastavu ili kad članovi uprave lizing društva ne mogu obavljati svoju funkciju iz nekih drugih razloga koji nisu navedeni u stavu (2) ovog člana, nadležni organ prema osnivačkom aktu lizing društva može, bez prethodne saglasnosti Agencije, jednokratno imenovati članove nadzornog odbora za zamjenike članova uprave i to najviše na rok od tri mjeseca, ako je to nužno zbog osiguranja poslovanja lizing društva i otklanjanja štetnih posljedica za lizing društvo i o tome u roku od 3 dana od dana imenovanja u pisanoj formi obavijestiti Agenciju."

Član 31.

Obaveze članova uprave lizing društva

- (1) Članovi uprave lizing društva moraju osigurati poslovanje lizing društva u skladu sa odredbama ovog Zakona i propisima donesenim na osnovu ovog Zakona.
- (2) Članovi uprave lizing društva moraju osigurati praćenje rizika kojima je izloženo lizing društvo kod poslovanja te donijeti odgovarajuće mjere kojima će lizing društvo ograničavati rizike.
- (3) Članovi uprave moraju osigurati postojanje i djelovanje sistema internih kontrola u svim područjima poslovanja lizing društva, te internu reviziju i osigurati da njihov rad bude u skladu sa politikama i procedurama lizing društva i posebnim propisima Agencije donesenim na osnovu ovog Zakona.
- (4) Članovi uprave lizing društva moraju osigurati vođenje poslovnih i drugih knjiga te poslovne dokumentacije, sastavljanje knjigovodstvenih dokumenata, procjenu knjigovodstvenih stavki, sastavljanje finansijskih i drugih izvještaja o čemu su dužni izvještavati ili obavještavati Agenciju u skladu sa ovim Zakonom i posebnim propisima Agencije.

POGLAVLJE VI OSTALI UVJETI ZA POSLOVANJE

Član 32.

Obaveza poslovanja u skladu sa zakonima

Lizing društvo dužno je svoje poslovanje obavljati u skladu sa ovim Zakonom, posebnim propisima Agencije i drugim zakonima.

Član 33.

Objava općih uvjeta poslovanja

Lizing društvo dužno je na pogodnom mjestu u svojim poslovnim prostorijama potencijalnim korisnicima lizinga učiniti dostupnim informacije o uvjetima pružanja svojih usluga, odnosno na drugi prikladan način učiniti dostupnim ove informacije.

Član 34.

Sprečavanje pranja novca

- (1) Lizing društvo obavezno je u svom poslovanju poduzimati mjere i radnje propisane Zakonom o sprečavanju pranja novca.
- (2) Lizing društvo mora imati razrađene politike i procedure za otkrivanje i sprečavanje transakcija koje uključuju kriminalne aktivnosti, pranje novca ili aktivnosti koje podržavaju terorizam i poduzimati mjere na utvrđivanju identiteta svih lica sa kojima ulazi u poslovne odnose u skladu sa posebnim propisima Agencije.
- (3) Davalac lizinga dužan je da uspostavi sistem internih kontrola i internu reviziju, donese politike i procedure radi otkrivanja i sprečavanja transakcija koje uključuju kriminalne aktivnosti, pranje novca, finansiranje terorističkih aktivnosti i aktivnosti koje opstruiraju uvođenje i primjenu međunarodnih restriktivnih mjera, kao i da poduzima mjere na utvrđivanju identiteta svih lica sa kojima ulazi u poslovne odnose, u skladu sa posebnim propisima Agencije.
- (4) Davalac lizinga dužan je da obavještava nadležne organe i dostavlja podatke u skladu sa propisima koji uređuju oblast sprečavanja pranja novca i finansiranja terorističkih aktivnosti, te o tome Agenciji dostavlja mjesečne statističke izvještaje, u formi koju propiše Agencija, u roku od 90 dana od dana stupanja na snagu ovog Zakona.

DIO TREĆI - UGOVOR O LIZINGU

POGLAVLJE I ZAKLJUČENJE I SADRŽAJ

Član 35.

Pojam ugovora o lizingu

- (1) Ugovorom o lizingu obavezuje se davalac lizinga da pribavi predmet lizinga od dobavljača predmeta lizinga i da ga ustupi korisniku lizinga, a korisnik lizinga se obavezuje da mu za to plaća lizing naknadu.
- (2) Korisnik lizinga određuje predmet lizinga i dobavljača predmeta lizinga.

Član 36.

Oblik i sadržaj ugovora o lizingu

- (1) Ugovor o lizingu mora biti zaključen u pisanoj formi i obavezno sadrži sljedeće odredbe:
 - a) podatke o subjektima ugovora o lizingu,
 - b) određenje da li se radi o finansijskom ili operativnom lizingu,
 - c) detaljno određenje predmeta lizinga,
 - d) vrijednost predmeta lizinga,
 - e) vrijeme trajanja lizinga koje ne može biti kraće od šest mjeseci,
 - f) ukupan iznos lizing naknade,
 - g) iznos, broj i dospelost pojedine lizing naknade,
 - h) mogućnost za otkup ili produženje ugovora o lizingu,
 - i) pravo davanja predmeta lizinga drugom na korištenje,
 - j) slučajeve koji će se tretirati kao neizvršenje obaveza od korisnika laesinga,
 - k) stopu zatezne kamate koja se plaća u slučaju neizvršenja obaveza.
- (2) Pored elemenata iz stava (1) ovog člana ugovor o lizingu može sadržavati i druge odredbe kojima se uređuju vrijeme, mjesto i način isporuke predmeta lizinga, rizici od kojih se predmet lizinga mora osigurati i način osiguranja, troškove transporta predmeta lizinga, troškove montaže, demontaže i tekuće održavanje predmeta lizinga, mogućnost obuke osoblja korisnika lizinga za korištenje predmeta lizinga, kao i druge odredbe.

Član 37.

Posebne odredbe za ugovor o finansijskom lizingu

(1) Ugovor o finansijskom lizingu, osim odredbi iz člana 36. stav (1) ovog Zakona, obavezno sadrži i sljedeće odredbe:

- a) iznos učešća u ukupnoj vrijednosti predmeta lizinga,
- b) efektivnu kamatnu stopu koja se koristi za obračun lizing naknade.
- c) iznos neto finansiranja (razlika između bruto nabavne vrijednosti predmeta lizinga i učešća),
- d) preostalu vrijednost predmeta lizinga (dio iznosa neto finansiranja koji se može ugovoriti, koji korisnik ne otplaćuje kroz rate, već odjednom, poslije isteka perioda na koji je ugovor zaključen ako je ugovorom predviđeno pravo korisnika da otkupi predmet lizinga),
- e) kod lizinga indeksiranog u stranoj valuti - valutu u kojoj se vrši indeksacija, tip kursa valute koji se primjenjuje pri odobravanju i otplati lizinga (zvanični srednji kurs), kao i datum obračuna,
- f) visinu nominalne godišnje kamatne stope uz određenje da li je fiksna ili promjenljiva, a ako je promjenljiva - elemente na osnovu kojih se određuje (referentna kamatna stopa, indeks potrošačkih cijena i dr.), njihovu visinu u vrijeme zaključenja ugovora, periode u kojima će se mijenjati, kao i fiksni element ako je ugovoren,
- g) uvjete i način prijevremene otplate i visinu naknade u vezi s tim,
- h) metod koji se primjenjuje kod obračuna kamate (konformni, proporcionalni i dr.),
- i) vrstu i visinu svih naknada koje padaju na teret primaoca lizinga, uz određenje da li su fiksne ili promjenljive, a ako su promjenljive - periode u kojima će ih davalac lizinga mijenjati, kao i vrstu i visinu drugih troškova (porezi, naknade nadležnim organima i dr.),
- j) vrste sredstava osiguranja, mogućnost za njihovu zamjenu tokom perioda otplate predmeta lizinga, kao i uvjete aktiviranja tih sredstava u slučaju neizmirivanja obaveza,
- k) obavještenje o pravu davaoca lizinga da proda predmet lizinga i da u slučaju neispunjenja ugovorenih obaveza od strane korisnika lizinga, davalac lizinga ima pravo da izuzme predmet lizinga te isti proda. U slučaju da davalac lizinga ostvari veću prodajnu cijenu od ukupne obaveze korisnika lizinga isti je dužan izvršiti povrat više naplaćenih sredstava korisniku lizinga,
- l) uvjete, postupak i posljedice raskida ugovora o lizingu, kao i obavještenje o uvjetima i načinu ustupanja potraživanja u slučaju neizmirenja obaveza,
- m) pravo korisnika na odustanak od ugovora, uvjete i način odustanka,
- n) pravo na prigovor i mogućnost pokretanja postupka posredovanja radi vansudskog rješavanja spornog odnosa.

Tačke c) do n) se odnose na ugovore o finansijskom lizingu koji se zaključuju sa fizičkim licem kao korisnikom, u svrhe koje nisu namijenjene njegovoj poslovnoj ili drugoj komercijalnoj djelatnosti.

(2) Agencija će posebnim aktom propisati način i metodu obračuna efektivne kamatne stope.

Član 38.

Posebne odredbe za ugovor o operativnom lizingu

(1) Ugovor o operativnom lizingu, osim odredbi iz člana 36. stav (1) ovog Zakona, obavezno sadrži i:

- a) iznos akontacijske naknade,
- b) iznos ukupne naknade.

(2) Agencija će posebnim aktom propisati način i metodu obračuna iznosa ukupne naknade.

Član 39.

Predočavanje uvjeta ugovora

Lizing društvo je dužno da prije zaključivanja ugovora o lizingu u pisanom obliku predoči korisniku lizinga, odnosno da mu učini dostupnim, sve bitne uvjete ugovora iz kojih su jasno vidljiva prava i obaveze ugovornih strana.

POGLAVLJE II PRAVA I OBAVEZE

Član 40.

Obaveze davaoca lizinga

- (1) Davalac lizinga dužan je prema zahtjevu korisnika lizinga pribaviti predmet lizinga od dobavljača predmeta lizinga koji je odredio korisnik lizinga.
- (2) Davalac lizinga dužan je obavijestiti dobavljača predmeta lizinga da predmet lizinga pribavlja radi izvršenja ugovora o lizingu te navesti lice koje je korisnik lizinga, osim ukoliko su davalac lizinga i dobavljač predmeta lizinga ista lica.
- (3) Obavijest iz stava (2) ovog člana davalac lizinga dužan je dostaviti dobavljaču predmeta lizinga najkasnije do preuzimanja predmeta lizinga.

Član 41.

Promjenjiva lizing naknada

U slučaju da je ugovorena promjenjiva lizing naknada davalac lizinga dužan je u pisanom obliku obavijestiti korisnika lizinga o promjeni te naknade prije nego što se ona počne primjenjivati.

Član 42.

Odgovornost za pravne i materijalne nedostatke

- (1) Dobavljač predmeta lizinga odgovara davaocu lizinga za pravne i materijalne nedostatke predmeta lizinga prema općim pravilima odgovornosti za materijalne i pravne nedostatke.
- (2) Zaključenjem ugovora o lizingu davalac lizinga ustupa korisniku lizinga zahtjeve koje ima prema dobavljaču predmeta lizinga na osnovu odgovornosti za pravne i materijalne nedostatke, osim ako ugovorom o lizingu nije drugačije ugovoreno.
- (3) Ukoliko predmet lizinga ima neki materijalni ili pravni nedostatak, a korisnik lizinga je propustio prema dobavljaču predmeta lizinga vršiti ustupljena prava, on nema nikakva prava na osnovu materijalnih ili pravnih nedostataka prema davaocu lizinga, a posebno ne pravo na raskid ugovora ili smanjenje lizing naknade.

Član 43.

Isključenje odgovornosti za štetu nastalu korištenjem predmeta lizinga

- (1) Davalac lizinga nije odgovoran korisniku lizinga ili trećem licu za štetu nastalu korištenjem predmeta lizinga, osim ako ugovorom o lizingu nije drugačije određeno.
- (2) Odredba stava (1) ovog člana ne primjenjuje se ako je do štete došlo uslijed neispravnosti ili greške predmeta lizinga.
- (3) U slučaju odgovornosti prema odredbi stava (2) ovog člana davalac lizinga ima pravo regresa prema dobavljaču predmeta lizinga. On ovo pravo može ustupiti korisniku lizinga i smatra se da je to učinio danom zaključenja ugovora o lizingu ukoliko tim ugovorom nije drugačije određeno.

Član 44.

Rizik od slučajnog gubitka ili štete

- (1) U finansijskom lizingu rizik od slučajnog gubitka ili štete na predmetu lizinga snosi korisnik lizinga od trenutka preuzimanja predmeta lizinga u posjed, ukoliko ugovorom o lizingu nije drugačije određeno.
- (2) U operativnom lizingu rizik od slučajnog gubitka ili štete na predmetu lizinga snosi davalac lizinga i ne prenosi se na korisnika lizinga.

Član 45.

Obaveze dobavljača predmeta lizinga za urednu isporuku

- (1) Dobavljač predmeta lizinga dužan je predmet lizinga isporučiti korisniku lizinga u ispravnom stanju na način određen ugovorom o lizingu, osim ako je ugovorom o lizingu predviđeno da predmet lizinga isporuči davalac lizinga.

(2) Onaj ko isporuči korisniku lizinga predmet lizinga odgovara prema općim pravilima obligacionog prava da predmet lizinga nema materijalne nedostatke.

Član 46.

Odgovornost dobavljača predmeta lizinga za neispunjenje ili zakašnjenje sa ispunjenjem

(1) Ako zbog okolnosti za koje ne odgovara dobavljač predmeta lizinga nije u mogućnosti isporučiti predmet lizinga, ugovor o lizingu ne proizvodi pravna dejstva.

(2) Ako dobavljač predmeta lizinga ne isporuči predmet lizinga u ugovorenom roku zbog razloga za koje snosi odgovornost, a rok nije bitni dio ugovora, korisnik lizinga mu mora ostaviti primjeren naknadni rok za ispunjenje i o tome obavijestiti davaoca lizinga. Ako dobavljač lizinga ni u naknadno određenom roku ne ispunji svoju obavezu, ugovor između davaoca i korisnika lizinga se raskida po samom zakonu.

(3) Korisnik lizinga ima pravo od davaoca lizinga tražiti naknadu pretrpljene štete zbog raskida ugovora, a davalac lizinga ima pravo tražiti naknadu pretrpljene štete zbog raskida ugovora od dobavljača predmeta lizinga.

(4) Svoje pravo na naknadu štete koje ima prema dobavljaču predmeta lizinga davalac lizinga može ustupiti korisniku lizinga. U slučaju prihvatanja ustupanja korisnik lizinga ne može postavljati nikakav odštetni zahtjev prema davaocu lizinga.

Član 47.

Solidarna odgovornost davaoca lizinga i dobavljača predmeta lizinga

Ako je davalac lizinga izabrao dobavljača predmeta lizinga, solidarno sa njim odgovara korisniku lizinga ako predmet lizinga nije isporučen korisniku lizinga, ako je isporučen sa zakašnjenjem ili ako predmet lizinga ima materijalni nedostatak.

Član 48.

Obaveze korisnika lizinga

(1) Korisnik lizinga dužan je preuzeti predmet lizinga na način određen ugovorom o lizingu.

(2) Ukoliko nije drugačije ugovoreno, korisnik lizinga je dužan izvršiti pregled predmeta lizinga kako bi ustanovio da predmet lizinga nema vidljivih nedostataka te pismeno potvrditi dobavljaču predmeta lizinga da je primio predmet lizinga. Od dana prijema predmeta lizinga, ugovor o lizingu proizvodi dejstvo i od tog dana je korisnik lizinga dužan plaćati lizing naknadu.

(3) Korisnik lizinga dužan je u skladu sa ugovorom ili namjenom predmeta lizinga koristiti predmet lizinga sa pažnjom dobrog privrednika, odnosno domaćina.

(4) Korisnik lizinga dužan je održavati predmet lizinga u dobrom stanju i snositi sve troškove takvog održavanja, ukoliko ugovorom o lizingu nije drugačije određeno.

(5) Gubitak predmeta lizinga ili gubitak njegove funkcije uzrokovan korištenjem predmeta lizinga suprotno st. (3) i (4) ovog člana ne oslobađa korisnika lizinga od njegovih obaveza određenih ugovorom o lizingu.

(6) Korisnik lizinga dužan je davaocu lizinga plaćati naknadu u iznosima, rokovima i na način određen ugovorom o lizingu.

(7) Korisnik lizinga dužan je po prestanku ugovora o lizingu bez odgađanja predmet lizinga vratiti davaocu lizinga na način i u stanju određenim ugovorom o lizingu, osim ako je u skladu sa ugovorom o lizingu ispunio uvjete kojima stiče pravo vlasništva nad predmetom lizinga, pravo produženja ugovora o lizingu ili je za taj predmet lizinga sklopljen novi ugovor o lizingu.

(8) Nakon raskida ugovora o lizingu korisnik lizinga je dužan vratiti predmet lizinga sa svim dijelovima i dodatnim elementima davaocu lizinga ili licu kojeg davalac lizinga odredi.

(9) Ako je prema propisu kojim se uređuju prekršaji, za prekršaj koji je u neposrednoj vezi sa korištenjem predmeta lizinga odgovoran vlasnik predmeta lizinga, a predmet lizinga u vrijeme počinjenja prekršaja nije bio u posjedu davaoca lizinga u svrhu utvrđivanja postojanja prekršaja i prekršajne odgovornosti, smatrat će se da je korisnik lizinga vlasnik predmeta lizinga.

Član 49.

Odgovornost korisnika lizinga za štetu nastalu korištenjem predmeta lizinga

- (1) Korisnik lizinga ne odgovara za istrošenost predmeta lizinga koja nastane njegovim redovnim korištenjem, kao ni za promjene na njemu koje su izvršene u dogovoru sa davaocem lizinga.
- (2) Korisnik lizinga odgovoran je za štetu koju uzrokuje korištenjem predmeta lizinga suprotno ugovoru ili namjeni predmeta lizinga, bez obzira na to da li je predmet lizinga koristio korisnik lizinga, lice koje radi po njegovom nalogu ili lice kome je on omogućio da koristi predmet lizinga.

Član 50.

Zaštita u slučaju stečaja ili likvidacije korisnika lizinga

- (1) Korisnik lizinga je dužan bez odlaganja obavijestiti davaoca lizinga o pokretanju stečajnog ili likvidacionog postupka.
- (2) U slučaju stečaja korisnika lizinga, davalac lizinga ima pravo na izdvajanje predmeta lizinga (izlučno pravo) iz stečajne mase korisnika lizinga u skladu sa propisima koji uređuju stečajni postupak.

Član 51.

Podlizing

- (1) Korisnik lizinga može, uz pismenu saglasnost davaoca lizinga, osim ukoliko ugovorom o lizingu nije drugačije određeno, prenijeti predmet lizinga ili njegove dijelove, trećoj strani na korištenje (u daljnjem tekstu: podlizing).
- (2) Prijenos predmeta lizinga na treću stranu koja će ga koristiti ne oslobađa korisnika lizinga njegove obaveze prema davaocu lizinga u skladu sa ugovorom o lizingu.
- (3) Rok o podlizingu ne smije prijeći rok ugovora o lizingu.
- (4) Pravo prijenosa predmeta lizinga na korištenje trećem licu može se isključiti ugovorom o lizingu ili njime drugačije urediti.

Član 52.

Primjena odredbi Zakona o obligacionim odnosima

- (1) Na pitanja koja nisu regulirana ovim Zakonom, a tiču se prava i obaveza ugovornih strana primjenjuju se odredbe Zakona o obligacionim odnosima, a naročito odredbe kojima je reguliran ugovor o zakupu.
- (2) Ugovorom o lizingu ne smatra se:
 - a) ugovor o zakupu zaključen u smislu Zakona o obligacionim odnosima;
 - b) ugovor kojim se definira davanje u zakup pokretne ili nepokretne stvari, a koji nije zaključen u skladu sa odredbama ovog zakona.

Član 53.

Dispozitivni karakter odredbi

Odredbe ovog Zakona koje se tiču prava i obaveza ugovornih strana kao i odredbe Zakona o obligacionim odnosima primjenjuju se ukoliko stranke nisu drugačije ugovorile.

POGLAVLJE III RASKID I PRESTANAK UGOVORA

Član 54.

Raskid ugovora o lizingu

- (1) Davalac lizinga ima pravo, ako ugovorom o lizingu nije drugačije određeno, raskinuti ugovor o lizingu ako korisnik lizinga:
 - a) zakasni sa isplatom prve lizing naknade,

- b) poslije isplate prve naknade korisnik lizinga zakasni sa dvije uzastopne lizing naknade,
- c) bez pismene saglasnosti davaoca lizinga predmet lizinga da u podlizing trećoj strani,
- d) znatno povrijedi odredbe ugovora koje se odnose na korištenje i održavanje predmeta lizinga.

(2) Bez obzira na odredbe iz stava (1), tač. a) i b) ovog člana davalac lizinga ima pravo da raskine ugovor o lizingu ako korisnik lizinga ne plati jednu od lizing naknada u ugovorenom roku, pod uvjetom da okolnosti jasno ukazuju da ni ostale naknade neće biti plaćene.

(3) Da bi raskinuo ugovor o lizingu iz razloga navedenih u stavu (1) tač. a) i b) i stavu (2) ovog člana davalac lizinga dužan je obavijestiti korisnika lizinga o namjeri raskida ugovora ukoliko ne primi uplate prispjelih obaveza i ostaviti korisniku lizinga naknadni razumni rok za ispunjenje obaveza. Ugovor o lizingu ostaje na snazi ako korisnik lizinga plati iznos dužne naknade prije nego mu je dostavljena obavijest o raskidu ugovora.

Član 55.

Efekti raskida ugovora o lizingu i naknada štete

(1) Davalac lizinga koji raskine ugovor o lizingu iz razloga utvrđenih članom 54., st. (1) i (2) ima pravo oduzeti predmet lizinga, kao i pravo na naknadu štete.

(2) Ugovorom o lizingu može se predvidjeti način na koji će se izračunati visina naknade štete, koja ne može prelaziti interese ispunjena ugovora.

(3) Raskidom ugovora iz stava (1) ovog člana korisnik lizinga gubi pravo posjedovanja i korištenja predmeta lizinga, a plaćene lizing naknade neće se smatrati plaćanjem predmeta lizinga i ne daju pravo korisniku lizinga na dio vlasništva nad predmetom lizinga.

Član 56.

Prestanak ugovora o lizingu

(1) Ugovor o lizingu prestaje:

- a) istekom roka na koji je zaključen,
- b) prijenosom prava vlasništva sa davaoca lizinga na korisnika lizinga,
- c) otkupom predmeta lizinga,
- d) raskidom ugovora o lizingu,
- e) uništenjem predmeta lizinga usljed djelovanja više sile, i
- f) iz drugih razloga u skladu sa propisima kojima se uređuju obligacioni odnosi.

(2) U slučajevima iz stava (1) ovog člana davalac lizinga je dužan u roku od 15 dana od dana prestanka ugovora o lizingu podnijeti zahtjev za brisanje upisanih prava iz nadležnog registra.

Član 57.

Povrat posjeda nad predmetom lizinga

(1) Davalac i korisnik lizinga mogu u formi notarski obrađene isprave pred notarom zaključiti poravnanje u kojem će se sporazumjeti da u slučaju neplaćanja lizing naknade od korisnika lizinga po dospijeću u skladu sa ugovorom, korisnik lizinga pristaje na neposredno izvršenje zahtjeva na predaju predmeta laesinga.

(2) Ako korisnik lizinga ne ispuni obavezu plaćanja lizing naknade po dospijeću u skladu sa ugovorom i davaocu lizinga ne preda dobrovoljno predmet lizinga, davalac lizinga može zahtijevati izvršni otpravak isprave iz stava (1) ovog člana i nadležnom sudu podnijeti prijedlog za izvršenje zahtjeva za predaju predmeta lizinga davaocu lizinga u posjed.

(3) Nadležni sud je obavezan da o prijedlogu za izvršenje odluči u roku od pet dana od dana podnošenja zahtjeva.

(4) Postupak oduzimanja predmeta lizinga provodi se u roku od tri dana od dana donošenja rješenja o izvršenju.

(5) Protiv rješenja o izvršenju korisnik lizinga može u roku od tri dana od dana prijema rješenja uložiti prigovor da je izvršio obaveze isplate o čemu mora podnijeti pismene dokaze.

(6) Prigovor iz stava (5) ovog člana ne odlaže izvršenje.

- (7) O prigovoru odlučuje nadležni sud u skladu sa zakonom kojim se uređuje izvršni postupak.
- (8) Na postupak za povrat posjeda nad predmetom lizinga primjenjuje se zakon kojim se uređuje izvršni postupak, ako ovim Zakonom nije drugačije određeno.

DIO ČETVRTI - REGISTRACIJA PREDMETA LIZINGA

Član 58.

Registri

- (1) Ako je predmet lizinga nepokretna stvar, pravo vlasništva na predmetu lizinga i prava na osnovu ugovora o lizingu nad predmetom lizinga upisuju se u skladu sa propisima kojima su uređeni upisi prava na nekretninama.
- (2) Ako je predmet lizinga pokretna stvar zaloga za koju posebnim zakonom nije propisana godišnja registracija, registracija prava na osnovu ugovora o lizingu (posebno vlasničko pravo) vrši se u Registru zaloga u skladu sa propisima kojima se uređuje registracija..
- (3) Ako je predmet lizinga pokretna stvar za koju je posebnim zakonom propisana godišnja registracija, kao npr. motorna vozila, registracija prava vlasništva vrši se u skladu sa zakonom koji definira registraciju vlasništva nad vozilima i u skladu sa stavom (2) ovog člana.

Član 59.

Obaveza upisa

- (1) Ako je predmet lizinga pokretna stvar definirana članom 58. stav (2) ovog Zakona, davalac lizinga je dužan podnijeti zahtjev za registraciju prava na osnovu ugovora o lizingu (posebno vlasničko pravo) te ostalih podataka iz ugovora o lizingu u skladu sa propisima kojima se uređuje registracija zaloga u roku od sedam dana od isporuke.
- (2) Ako su u pitanju nepokretne stvari, davalac usluga lizinga je dužan podnijeti zahtjev za uknjižbu prava vlasništva i prava iz ugovora o lizingu u roku od 60 dana od ispunjenja svih uvjeta za uknjižbu.
- (3) Zahtjev za promjenu ili brisanje podataka iz st. (1) i (2) ovog člana iz nadležnog registra davalac lizinga je dužan podnijeti u roku od 15 dana od dana nastupanja činjenica koje su tu promjenu ili brisanje podataka uvjetovale.

DIO PETI - UPRAVLJANJE RIZICIMA

Član 60.

Upravljanje rizicima

- (1) Lizing društvo mora imati razrađene politike i procedure za identificiranje, mjerenje i praćenje rizika kojima je izloženo u svom poslovanju.
- (2) Upravljanje rizicima je sveobuhvatan proces, odnosno skup postupaka, metoda i tehnika za identifikaciju, mjerenje i procjenu te upravljanje i ovladavanje rizicima kojima je lizing društvo izloženo ili bi moglo biti izloženo u svom poslovanju, uključujući i izvještavanje o istim. Lizing društvo dužno je uspostaviti sveobuhvatan i efikasan sistem upravljanja rizicima u skladu s vrstom, obimom i složenosti svog poslovanja, koji mora uključivati najmanje:
- a) strategije, politike, postupke i mjere upravljanja rizicima,
 - b) tehnike mjerenja rizika,
 - c) podjelu odgovornosti u vezi sa upravljanjem rizicima.

Član 60a.

Opći organizacioni zahtjevi

- (1) Uzimajući u obzir vrstu i složenost poslovanja, lizing društvo dužno je uspostaviti, provoditi te redovno ažurirati, procjenjivati i nadzirati efikasne i primjerene:

- a) postupke odlučivanja i organizacionu strukturu koja jasno i na dokumentovan način utvrđuje linije odgovornosti i dodjeljuje funkcije i odgovornosti;
 - b) mehanizme internih kontrola, namijenjene osiguranju usklađenosti sa ovim Zakonom i propisima donesenim na osnovu ovog Zakona i drugih propisa, te internim odlukama, procedurama i postupcima na svim nivoima lizing društva;
 - c) evidencije svih internih akata, kao i njihovih izmjena;
 - d) administrativne i računovodstvene procedure i postupke te sistem izrade poslovnih knjiga i finansijskih izvještaja, kao i procedure i postupke vođenja i čuvanja poslovne dokumentacije koje će osigurati istinit i fer prikaz finansijskog stanja društva u skladu sa svim važećim računovodstvenim propisima;
 - e) mjere i postupke za ispravan rad, nadzor i zaštitu informacionog sistema društva i
 - f) mjere i postupke za očuvanje cjelovitosti, dostupnosti i povjerljivosti informacija.
- (2) Lizing društvo dužno je u okviru mehanizma interne kontrole, uzimajući u obzir vrstu, obim i složenost svog poslovanja, te vrstu i obim usluga koje pruža i obavlja, uspostaviti vlastitu funkciju upravljanja rizicima i funkciju interne revizije, koja nezavisno i objektivno procjenjuje sistem internih kontrola, daje nezavisno i objektivno stručno mišljenje i savjete za unapređenje poslovanja s ciljem poboljšanja poslovanja lizing društva, uvodeći sistematičan, disciplinovan pristup procjenjivanju i poboljšanju djelotvornosti upravljanja rizicima, kontrole i korporativnog upravljanja.

Član 60b.

Izdvajanje poslovnih procesa lizing društva (eksternalizacija)

- (1) Lizing društvo može izdvojiti (eksternalizovati) određene poslovne procese kojima se podržava obavljanje osnovne djelatnosti lizing društva na način da ih, na osnovu ugovora u pisanoj formi, prenese na drugo lice. Izdvajanje poslovnih procesa je ugovorno povjeravanje obavljanja radnji, usluga ili aktivnosti drugom licu koje bi inače obavljalo lizing društvo. Pružalac usluga može biti bilo koje fizičko ili pravno lice koje je prema propisima države u kojoj obavlja djelatnost ovlašteno obavljati poslove koji su predmet izdvajanja.
- (2) Lizing društvo ne smije eksternalizovati djelatnost pružanja lizing usluga za koje je dobilo dozvolu za rad od strane Agencije.
- (3) Ugovorom o izdvajanju poslovnih procesa mora biti ugovoreno da je lice na koje se prenose poslovni procesi lizing društva dužno omogućiti provođenje nadzora od strane Agencije nad prenesenim poslovnim procesima. Lizing društvo dužno je uspostaviti odgovarajući sistem upravljanja rizicima koji su povezani s izdvojenim poslovnim procesima.
- (4) Odgovornost lizing društva prema trećim licima ni u kojem slučaju se ne smije prenijeti na pružaoce usluga.
- (5) Lizing društvo ne smije eksternalizovati prava i obaveze organa upravljanja, kao ni kontrolne funkcije lizing društva (kreditna funkcija i funkcija rizika, interna revizija i sl.).
- (6) Izuzetno od stava (5) ovog člana, lizing društvo smije eksternalizovati segmente funkcije interne revizije koje se odnose na reviziju informacionih tehnologija i druge specifične vrste interne revizije.
- (7) Lizing društvo dužno je osigurati da izdvajanje poslovnih procesa na drugo lice ne narušava:
- a) obavljanje redovnog poslovanja lizing društva;
 - b) djelotvorno upravljanje rizicima lizing društva;
 - c) sistem internih kontrola lizing društva;
 - d) mogućnost obavljanja nadzora od strane Agencije.
- (8) Agencija je ovlaštena zabraniti izdvajanje određenih poslovnih procesa ili zahtijevati ispunjavanje dodatnih uvjeta ako procijeni da bi takvo izdvajanje poslovnih procesa moglo onemogućiti ili otežati djelotvorno i kontinuirano ispunjavanje uvjeta iz stava 3. ovog člana.
- (9) Agencija će posebnim aktom propisati uvjete i kriterije za izdvajanje poslovnih procesa (eksternalizaciju).

Član 61.

Propisi o upravljanju, načinu utvrđivanja rezervi i izvještavanju o rizicima

Agencija može podzakonskim aktom propisati lizing društvu iz člana 3. ovog Zakona kriterije i način upravljanja rizicima, utvrditi rezerve, uvjete i način upotrebe rezervi, te oblik, način i rokove izvještavanja o upravljanju rizicima.

Član 62.

Teže kršenje pravila o upravljanju rizikom

Lizing društvo teže krši pravila o upravljanju rizikom ako:

- a) mu je ugrožena likvidnost,
- b) nije organiziralo poslovanje, odnosno ne vodi poslovne knjige, poslovnu dokumentaciju te druge administrativne i poslovne evidencije na način da je moguće u bilo kojem trenutku provjeriti posluje li u skladu sa ovim Zakonom,
- c) ne donese mjere i odredi pravila odgovarajućeg vrednovanja bilansnih i vanbilansnih stavki, odnosno ako te stavke vrednuje suprotno odredbama ovog Zakona i propisima donesenim na osnovu njega,
- d) obavlja djelatnosti koje prema ovom Zakonu ne smije obavljati,
- e) krši obavezu pravovremenog i korektnog izvještavanja, određenu ovim Zakonom i propisima donesenim na osnovu njega,
- f) zaključuje prividne poslove u namjeri netačnog iskazivanja finansijskog stanja.

DIO ŠESTI - FINANSIJSKO IZVJEŠTAVANJE I REVIZIJA

Član 63.

Vodenje poslovnih knjiga, dokumentacije i evidencija

- (1) Lizing društvo obavezno je voditi i čuvati knjigovodstvene evidencije i dokumente, te sastavljati i prezentirati finansijske izvještaje u skladu sa propisima kojima se uređuje oblast računovodstva i revizije.
- (2) Finansijske izvještaje iz stava (1) ovog člana lizing društvo dužno je podnositi nadležnim organima na način i u rokovima utvrđenim zakonom i drugim propisima kojima se uređuje oblast računovodstva i revizije.

Član 64.

Revizija

- (1) Lizing društvo dužno je imenovati, uz saglasnost Agencije, vanjskog revizora koji će izvršiti reviziju godišnjih finansijskih izvještaja i sačiniti revizorski izvještaj u skladu sa propisima kojima se uređuje oblast računovodstva i revizije.
- (2) Isti vanjski revizor može u istom lizing društvu uzastopno obaviti najviše četiri revizije godišnjih finansijskih izvještaja.
- (3) Vanjski revizor ne može u istoj poslovnoj godini obavljati reviziju finansijskih izvještaja i pružati konsultantske usluge istom lizing društvu.
- (4) Lizing društvo obavezno je Agenciji dostaviti godišnji finansijski izvještaj, zajedno sa revizorskim izvještajem, najkasnije pet mjeseci po isteku poslovne godine na koju se izvještaji odnose.

Član 65.

Ovlaštenja Agencije u vezi sa obavljenom revizijom

- (1) Revizor je dužan na zahtjev Agencije dati i druga obrazloženja u vezi sa obavljenom revizijom.
- (2) Agencija može odbiti mišljenje revizora o finansijskim izvještajima i zahtijevati da reviziju obavi drugi ovlašteni revizor na trošak lizing društva kada utvrdi da finansijski izvještaji ne

prikazuju istinit i vjeran prikaz finansijskog stanja lizing društva u skladu sa propisima Federacije.

DIO SEDMI - NADZOR NAD POSLOVANJEM LIZING DRUŠTVA

POGLAVLJE I NADZOR NAD LIZING DRUŠTVIMA

Član 66.

Djelokrug nadzora

Agencija vrši nadzor nad poslovanjem lizing društava sa sjedištem u Federaciji i svih njegovih podružnica sa sjedištem u Federaciji i izvan Federacije.

Član 67.

Način vršenja nadzora

Agencija vrši nadzor nad poslovanjem lizing društva na sljedeći način:

- a) praćenjem, prikupljanjem i provjerom izvještaja i obavijesti lizing društava (posredni nadzor),
- b) pregledom poslovanja lizing društva (neposredni nadzor),
- c) izricanjem mjera nadzora u skladu sa ovim Zakonom.

Član 68.

Posredni nadzor

Agencija će podzakonskim aktom propisati činjenice i okolnosti o kojima je lizing društvo dužno izvještavati Agenciju, kao i način i rokove izvještavanja.

Član 69.

Neposredni nadzor

- (1) Agencija vrši neposredni nadzor nad lizing društvima radi provjere posluju li lizing društva u skladu sa članom 32. ovog Zakona, ali nije dužna rješavati pojedinačne reklamacije i žalbe lica sa kojima lizing društvo posluje.
- (2) Nadzor nad poslovanjem lizing društva mogu vršiti i druga nadzorna tijela u skladu sa ovlaštenjima na osnovu zakona u okviru svog djelokruga poslovanja.

Član 70.

Mjere nadzora

Agencija može izreći sljedeće mjere nadzora nad poslovanjem lizing društva:

- a) preporuku upravi lizing društva,
- b) opomenu,
- c) otklanjanje nezakonitosti i nepravilnosti,
- d) određivanje dodatnih mjera,
- e) oduzimanje dozvole.

POGLAVLJE II POSTUPAK NADZORA

Član 71.

Ovlaštena lica

- (1) Nadzor nad poslovanjem lizing društva provode ovlaštena lica Agencije.
- (2) Radi vršenja nadzora nad poslovanjem lizing društva, Agencija može ovlastiti vanjskog revizora ili drugo stručno lice.
- (3) Ovlaštena lica iz stava (2) ovog člana imaju kod vršenja nadzora nad poslovanjem za koje su ovlaštena jednake nadležnosti kao ovlaštena lica Agencije.

Član 72.
Obim nadzora

Nadzor nad poslovanjem lizing društva može obuhvatiti cjelokupno poslovanje (obimna kontrola) ili njegov dio (ciljana kontrola), u skladu sa posebnim propisima Agencije.

Član 73.
Izvještaji i informacije

- (1) Agencija može od lizing društva zatražiti informacije o svim poslovima koji su, s obzirom na svrhu pojedinog nadzora, bitne za procjenu postupanja u skladu sa ovim Zakonom i posebnim propisima Agencije.
- (2) Članovi nadzornog odbora, uprave i djelatnici lizing društva dužni su ovlaštenom licu, na njegov zahtjev, dati izvještaje i informacije o svim poslovima bitnim za vršenje nadzora.
- (3) Agencija može pozvati lica iz stava (2) ovog člana da o poslovima iz stava (1) ovog člana, u roku koji ne smije biti kraći od tri dana, daju usmenu izjavu ili sastave izvještaj u pisanom obliku.

Član 74.
Uvjeti za vršenje nadzora

- (1) Lizing društvo dužno je ovlaštenim licima Agencije, na njihov zahtjev, omogućiti vršenje nadzora nad poslovanjem u svom sjedištu, odnosno u drugim prostorijama u kojima obavljaju djelatnosti i staviti im na raspolaganje odgovarajuće prostorije u kojima mogu neometano i bez prisutnosti drugih lica vršiti nadzor nad poslovanjem.
- (2) Agencija je dužna nadzor nad poslovanjem lizing društva izvršiti na način da time ne ometa normalno poslovanje lizing društva u skladu sa predmetom pojedinog nadzora.

Član 75.
Nadzor nad poslovanjem

- (1) Lizing društvo dužno je ovlaštenom licu Agencije, na njegov zahtjev, omogućiti pregled poslovnih knjiga, poslovne dokumentacije i administrativnih, odnosno poslovnih evidencija u obimu nužnom za vršenje pojedinog nadzora, odnosno u obimu određenom zakonom kojim se uređuje pojedini nadzor.
- (2) Lizing društvo dužno je ovlaštenom licu Agencije, na njegov zahtjev, predati kompjuterske ispise, odnosno fotokopije poslovnih knjiga, poslovne dokumentacije i administrativnih, odnosno poslovnih evidencija.

Član 76.
Obavještenje o nadzoru

- (1) Agencija lizing društvu dostavlja obavještenje o nadzoru najmanje osam dana prije početka nadzora nad poslovanjem lizing društva.
- (2) Izuzetno od odredbe stava (1) ovog člana, ovlašteno lice može obavještenje o nadzoru uručiti prilikom početka nadzora nad poslovanjem.
- (3) Obavještenje o nadzoru nad poslovanjem mora obuhvatiti predmet nadzora.
- (4) Agencija može za vrijeme vršenja nadzora poslovanja dopuniti obavještenje o nadzoru nad poslovanjem.

Član 77.
Nalazi nadzora

Nakon obavljenog nadzora nad poslovanjem lizing društva ovlaštena lica Agencije sastavljaju zapisnik o obavljenom nadzoru koji su dužne dostaviti lizing društvu.
Lizing društvo ima pravo prigovora na zapisnik o nadzoru.
Prigovor se dostavlja Agenciji u roku od osam dana od dana prijema zapisnika.

Član 78.
Naknada za nadzor

Lizing društva dužna su Agenciji plaćati naknadu za obavljanje poslova nadzora u skladu sa tarifom koju propisuje Agencija.

POGLAVLJE III MJERE U OTKLANJANJU NEZAKONITOSTI I NEPRAVILNOSTI

Član 78a.

Preporuke upravi lizing društva

(1) Kada Agencija u okviru nadzora te provjere i procjene finansijske stabilnosti i položaja lizing-društva, kao i provjere i procjene rizika kojima je lizing društvo izloženo ili bi moglo biti izloženo u svom poslovanju utvrdi slabosti, manjkavosti, nedostatke i nepravilnosti koje nemaju značaj kršenja ovog Zakona ili propisa donesenih na osnovu njega, te drugih zakona i propisa donesenih na osnovu istih ili ako Agencija smatra potrebnim da lizing društvo poduzme radnje i aktivnosti radi poboljšanja poslovanja, finansijske stabilnosti i položaja te smanjenja rizika kojima je izloženo ili može biti izloženo u svom poslovanju, Agencija će izreći preporuke upravi lizing društva.

(2) Preporuke sadrže utvrđene i procijenjene značajne rizike i probleme kojima je lizing društvo izloženo ili bi moglo biti izloženo, odnosno utvrđene slabosti, manjkavosti, nedostatke i nepravilnosti koje nemaju značaj kršenja propisa ovog Zakona te smjernice upravi društva za upravljanje u cilju otklanjanja istih, kao i u cilju poboljšanja poslovanja, finansijske stabilnosti i položaja te smanjenja rizika kojima je lizing društvo izloženo ili može biti izloženo u svom poslovanju.

(3) Uprava lizing društva dužna je Agenciji dostaviti plan, rokove i dinamiku postupanja po preporukama Agencije.

(4) Kako bi utvrdila poboljšanje poslovanja, finansijske stabilnosti i položaja te smanjenja rizika kojima je lizing društvo izloženo ili može biti izloženo u svom poslovanju, Agencija može provesti ponovni nadzor nad lizing društvom.

Član 78b.
Opomena

(1) Kad Agencija tokom nadzora utvrdi nezakonitosti i nepravilnosti, a priroda i obim utvrđenih nezakonitosti i nepravilnosti nemaju značajan utjecaj i posljedice na poslovanje lizing društva Agencija može izreći opomenu lizing društvu.

(2) Opomena Agencije može sadržavati i nalog da lizing društvo ispravi utvrđene nezakonitosti i nepravilnosti, te rokove u kojima je lizing društvo dužno to učiniti i dinamiku obavještanja Agencije o poduzetim radnjama i aktivnostima.

(3) Ako lizing društvo ne postupi po nalogu i u roku Agencije iz stava (2) ovog člana, Agencija će izdati rješenje za otklanjanje utvrđenih nezakonitosti i nepravilnosti.

(4) Agencij je ovlaštena provesti ponovni nadzor nad lizing društvom u mjeri i obimu koje su potrebne da se utvrdi je li lizing društvo postupilo po nalogu Agencije iz stava (2) ovog člana, te jesu li utvrđene nezakonitosti i nepravilnosti otklonjene na odgovarajući način i u odgovarajućem obimu.

Član 79.

Rješenje za otklanjanje nezakonitosti i nepravilnosti

Kada Agencija prilikom vršenja nadzora utvrdi da lizing društvo svoje poslovanje ne obavlja u skladu sa članom 32. ovog Zakona, naložit će rješenjem lizing društvu otklanjanje nezakonitosti i nepravilnosti, a može mu naložiti i da poduzme, odnosno da ne poduzima određene radnje.

Član 80.

Uvjeti i rokovi u rješenju

- (1) Agencija donosi rješenje iz člana 79. ovog Zakona ako utvrdi sljedeće:
 - a) lizing društvo ne ispunjava uvjete za obavljanje poslova lizinga,
 - b) lizing društvo obavlja djelatnosti koje prema ovom Zakonu ne smije obavljati,
 - c) lizing društvo krši pravila o upravljanju rizicima,
 - d) lizing društvo krši pravila o vođenju poslovnih knjiga i izradi finansijskih izvještaja, odnosno reviziji finansijskih izvještaja,
 - e) lizing društvo krši obavezu izvještavanja,
 - f) lizing društvo krši pravila o sprečavanju pranja novca i finansiranju terorizma,
 - g) lizing društvo krši druge odredbe ovog Zakona ili posebnih propisa Agencije, odnosno odredbe drugih zakona kojima se uređuje poslovanje lizing društava.
- (2) Rješenjem iz stava (1) ovog člana Agencija određuje rok za otklanjanje nezakonitosti i nepravilnosti.
- (3) Rješenje iz stava (1) ovog člana je konačno i protiv njega se može pokrenuti upravni spor.

Član 81.

Sadržaj rješenja

Rješenje za otklanjanje nezakonitosti i nepravilnosti mora sadržavati:

- a) tačan opis utvrđene nezakonitosti i nepravilnosti, uz navođenje odredbi zakona koje se ne poštuju,
- b) rok u kojem nadzirano lizing društvo mora otkloniti nepravilnosti i podnijeti izvještaj o otklanjanju nepravilnosti,
- c) način otklanjanja nepravilnosti u slučaju kada Agencija naloži nadziranom lizing društvu da nepravilnosti otkloni na određeni način,
- d) dokumente, odnosno dokaze o otklanjanju nepravilnosti u slučaju kada Agencija naloži da nadzirano lizing društvo predoči određene dokumente odnosno druge dokaze.

Član 82.

Izvještaj o otklanjanju nezakonitosti i nepravilnosti

- (1) Lizing društvo dužno je u roku koji odredi Agencija rješenjem iz člana 80. stav (2) ovog Zakona otkloniti utvrđene nezakonitosti i nepravilnosti, te Agenciji u roku koji odredi Agencija, dostaviti izvještaj u kojem su opisane mjere za otklanjanje nezakonitosti i nepravilnosti.
- (2) Uz izvještaj iz stava (1) ovog člana moraju biti priloženi dokumenti i drugi dokazi iz kojih proizilazi da su utvrđene nezakonitosti i nepravilnosti otklonjene.
- (3) Ako iz izvještaja iz stava (1) ovog člana i priloženih dokaza ne proizilazi da su nezakonitosti i nepravilnosti otklonjene, odnosno u cilju utvrđivanja tačnosti dostavljene dokumentacije, Agencija može obaviti ponovni pregled poslovanja u obimu potrebnom da bi se utvrdilo jesu li nezakonitosti i nepravilnosti otklonjene (kontrola izvršenja naloga).
- (4) Ako je izvještaj iz stava (1) ovog člana nepotpun, odnosno iz izvještaja i priloženih dokaza ne proizilazi da su utvrđene nezakonitosti i nepravilnosti otklonjene, Agencija će lizing društvu rješenjem naložiti dopunu izvještaja i odrediti rok za dopunu.
- (5) Ako su rješenjem Agencije određene dodatne mjere iz člana 83. ovog Zakona, odredbe ovog člana, koje se odnose na otklanjanje nezakonitosti i nepravilnosti i na izvještaj o uklanjanju nezakonitosti i nepravilnosti, odnose se i na provođenje dodatnih mjera te na obavještavanje o provođenju dodatnih mjera.

Član 83.

Dodatne mjere o otklanjanju nezakonitosti i nepravilnosti

- (1) Ako Agencija prilikom vršenja nadzora utvrdi da lizing društvo teže krši pravila o upravljanju rizikom iz člana 62. ovog Zakona, rješenjem o otklanjanju nezakonitosti i nepravilnosti može odrediti i sljedeće dodatne mjere:

- a) naložiti upravi lizing društva da prihvati plan mjera radi osiguranja solventnosti lizing društva;
 - b) naložiti upravi lizing društva i nadzornom odboru sazivanje skupštine lizing društva te predlaganje odgovarajućih odluka kao što su:
 - 1) odluka o povećanju osnovnog kapitala lizing društva,
 - 2) odluka o povećanju osnovnog kapitala iz dobiti lizing društva,
 - 3) razrješenje člana nadzornog odbora ako svojim radom nanosi ili može nanijeti štetu lizing društvu;
 - c) zabraniti lizing društvu sklapanje novih ugovora o lizingu u pojedinim ili svim poslovima lizinga;
 - d) zabraniti lizing društvu obavljanje poslova lizinga određenim licima;
 - e) zabraniti lizing društvu sklapanje poslova sa pojedinim dioničarima, članovima uprave, članovima nadzornog odbora, licima koja su sa lizing društvom povezana lica u skladu sa posebnim propisom Agencije;
 - f) naložiti upravi lizing društva donošenje ili provedbu mjere radi:
 - 1) poboljšanja postupaka upravljanja rizicima,
 - 2) poboljšanja postupka naplate dospjelih potraživanja lizing društva,
 - 3) ispravnog vrednovanja bilansnih i vanbilansnih stavki,
 - 4) poboljšanja informacionog sistema,
 - 5) druge mjere nužne radi realizacije solventnosti lizing društva;
 - g) zabraniti, odnosno ograničiti lizing društvu raspolaganje imovinom kojom upravlja lizing društvo.
- (2) Agencija može naložiti nadzornom odboru lizing društva razrješenje dužnosti člana uprave i imenovanje novog člana odnosno novih članova uprave u sljedećim slučajevima:
- a) lizing društvo nije postupilo u skladu sa rješenjem o otklanjanju nezakonitosti i nepravilnosti, odnosno
 - b) uprava lizing društva nije provela dodatne mjere iz stava (1) ovog člana koje je odredila, odnosno
 - c) lizing društvo ponovo krši obavezu pravovremenog i tačnog izvještavanja, odnosno obavještavanja Agencije ili ometa Agenciju u vršenju nadzora.

POGLAVLJE IV NADZOR NAD DRUGIM LICIMA

Član 83a.

Obavljanje lizinga bez dozvole

Agencija je ovlaštena provoditi i nadzor nad drugim licima za koja raspolaže podacima:

- a) da osim drugih djelatnosti ili kao jedinu djelatnost obavljaju poslove lizinga, bez dozvole za obavljanje poslova lizinga izdate od strane Agencije;
- b) da su korisnici lizinga koji su zaključili ugovor sa pravnim licem registrovanim van teritorije BiH.

Član 83b.

Mjere nadzora

- (1) Agencija u postupku nadzora iz člana 83a. ovog Zakona obavlja pregled poslovnih knjiga i druge dokumentacije nadziranih lica.
- (2) Ako Agencija u postupku nadzora utvrdi da lice postupa na način iz člana 83a. ovog Zakona, tom će licu naložiti Rješenjem da otkloni nezakonitosti i nepravilnosti. U rješenju se nalažu mjere koje mogu obuhvatiti i obustavljanje zaključivanja novih ugovora o lizingu i/ili prijenos lizing poslovanja na lizing društvo koje posjeduje dozvolu za obavljanje poslova lizinga izdatu od strane Agencije.

POGLAVLJE V POVJERLJIVI PODACI

Član 83c.

Opća odredba

Lizing društvo dužno je kao povjerljive čuvati sve podatke, informacije, činjenice i okolnosti za koje je saznalo u poslovanju s korisnikom lizinga, odnosno dobavljačem lizinga.

Član 83d.

Obaveza čuvanja povjerljivih podataka

(1) Vlasnici, članovi organa upravljanja, te radnici lizing društva, odnosno druga lica kojima su vezano za njihov rad u lizing društvu ili uz pružanje usluga za lizing društvo na bilo koji način dostupni podaci iz člana 83c. ovog Zakona ne smiju te podatke saopćavati trećim licima, iskoristiti ih protiv interesa lizing društva i njegovih klijenata ili omogućiti da ih koriste treća lica.

(2) Obaveza čuvanja povjerljivih podataka ne vrijedi u sljedećim slučajevima:

a) ako korisnik lizinga, odnosno dobavljač lizinga u pisanoj formi pristane da se pojedini povjerljivi podaci saopće,

b) ako nadležni sud ili drugo nadležno tijelo u pisanoj formi zahtijeva, odnosno naloži dostavljanje tih podataka radi utvrđivanja činjenica u krivičnom ili prekršajnom postupku ili za potrebe utvrđivanja činjenica nužnih za pokretanje takvih postupaka,

c) u slučajevima određenim propisima koji uređuju sprečavanje pranja novca i finansiranje terorizma,

d) ako su ti podaci potrebni u svrhu razjašnjavanja međusobnih pravnih odnosa između lizing društva i korisnika lizinga, odnosno dobavljača lizinga, odnosno drugih nosilaca prava iz ugovora o lizingu te između korisnika lizinga i trećih lica u sudskim postupcima, arbitražnim postupcima i postupcima mirenja,

e) ako nadležni sud u pisanoj formi zahtijeva, odnosno naloži dostavljanje tih podataka za potrebe ostavinskog, stečajnog postupka i drugog sudskog postupka,

f) ako nadležni sud ili drugo nadležno tijelo u pisanoj formi zahtijeva, odnosno naloži dostavljanje tih podataka radi izvršenja nad imovinom korisnika lizinga, odnosno drugog nosioca prava iz ugovora o lizingu ili nad imovinom trećih lica,

g) ako nadležno tijelo koje obavlja poslove nadzora nepropisno zaustavljenih i parkiranih vozila, te premještanja nepropisno zaustavljenih i parkiranih vozila, ili nadzor parkiranja vozila na mjestima na kojima je parkiranje vremenski ograničeno, kao i pravno lice koje obavlja komunalne poslove, u pisanoj formi zahtijeva predodjenje tih podataka u svrhu izvršenja svojih ovlaštenja,

h) ako se ti podaci dostavljaju Agenciji za potrebe nadzora koji u okviru svojih nadležnosti provodi Agencija, odnosno drugo nadzorno tijelo,

i) ako se ti podaci dostavljaju poreznim organima, za potrebe postupaka koje oni provode u okviru svojih nadležnosti,

j) ako se ti podaci saopćavaju pravnom licu koje se registrovano bavi prikupljanjem i pružanjem podataka o obavezama iz poslova lizinga,

k) ako je to propisano posebnim zakonom.

(3) Obaveza čuvanja povjerljivih podataka postoji za lica iz stava (1) ovog člana i nakon prestanka rada u lizing društvu, odnosno nakon prestanka svojstva vlasnika lizing društva ili člana organa upravljanja lizing društva, kao i nakon prestanka ugovornog odnosa o obavljanju poslova za lizing društvo.

(4) Nadzorno tijelo, odnosno druga tijela i sudovi smiju podatke koje su prikupili na osnovu stava (2) ovog člana upotrijebiti isključivo u svrhu zbog koje su prikupljeni.

Član 83e.

Prikupljanje, vođenje i upotreba povjerljivih podataka

Lizing društva prikupljaju, obrađuju, čuvaju, dostavljaju i upotrebljavaju povjerljive podatke iz člana 83c. ovog Zakona, u skladu s propisima koji uređuju zaštitu ličnih podataka i ostalim propisima o zaštiti podataka.

DIO OSMI - STEČAJ I LIKVIDACIJA

Član 84.

Stečaj lizing društva

Na stečaj lizing društva na odgovarajući način primjenjuju se odredbe Zakona o stečajnom postupku.

Član 85.

Likvidacija lizing društva

(1) Likvidacija lizing društva provodi se u skladu sa odredbama Zakona o likvidacionom postupku, osim ako ovim Zakonom nije drugačije određeno.

(2) U slučaju oduzimanja dozvole za obavljanje poslova lizinga, otvara se likvidacioni postupak lizing društva.

(3) Agencija podnosi prijedlog za otvaranje postupka iz stava (2) ovog člana pred nadležnim sudom.

(4) Prije donošenja odluke o likvidaciji lizing društva, uprava i nadzorni odbor lizing društva dužni su obaviti prethodne konsultacije sa Agencijom.

(5) Likvidatori su dužni obavijestiti Agenciju o odluci o likvidaciji lizing društva u roku od tri dana od dana njenog donošenja.

(6) Likvidatori lizing društva dužni su okončati poslove koji su u toku, naplatiti potraživanja, unovčiti imovinu lizing društva i podmiriti obaveze prema povjeriocima te eventualni ostatak imovine podijeliti vlasnicima lizing društva.

(7) Izuzetno, u mjeri u kojoj to zahtijeva provođenje likvidacije, likvidatori mogu ugovoriti nove poslove.

Član 86.

Postavljanje likvidatora

Za likvidatora lizing društva može biti postavljeno samo lice koje ispunjava uvjete za imenovanje za člana uprave lizing društva iz člana 30. ovog Zakona.

Član 87.

Obavješćavanje Agencije

Likvidator je dužan, ako utvrdi da imovina lizing društva u likvidaciji nije dovoljna za isplatu svih potraživanja vjerovnika, bez odlaganja podnijeti prijedlog za otvaranje stečajnog postupka i o tome istovremeno obavijestiti Agenciju.

DIO DEVETI - PREKRŠAJNE ODREDBE

Član 88.

Prekršajni postupak

Prekršajni postupak pokreće se na sljedeći način:

a) izdavanjem prekršajnog naloga,

b) podnošenjem zahtjeva za pokretanje prekršajnog postupka nadležnom sudu u slučaju da ne postoje uvjeti za izdavanje prekršajnog naloga, u skladu sa Zakonom o prekršajima.

Član 89.

Izdavanje prekršajnog naloga

(1) Prekršajni nalog izdaje lice utvrđeno posebnim propisom Agencije ukoliko ustanovi da je prekršaj utvrđen na jedan od sljedećih načina:

- a) zapisnički konstatovan od ovlaštenog lica Agencije koje je vršilo nadzor lizing društva,
- b) podacima koji su dobijeni na osnovu izvještavanja lizing društva,
- c) podacima koji su dobijeni u postupku izdavanja saglasnosti lizing društvu,
- d) podacima dobivenim na drugi način i naknadno utvrđenim od ovlaštenog lica Agencije.

(2) Prilikom izdavanja prekršajnog naloga može se izreći samo minimalna novčana kazna predviđena ovim Zakonom, osim u slučaju da je počinjeno više prekršaja (sticaj), kada se izriče jedinstvena novčana kazna koja mora biti veća od minimalnog iznosa svake pojedine utvrđene novčane kazne, ali ne smije preći zbir minimalnih utvrđenih kazni.

(3) Sud može izreći bilo koju novčanu kaznu propisanu ovim Zakonom.

Član 90.

Zahtjev za pokretanje prekršajnog postupka

Zahtjev za pokretanje prekršajnog postupka nadležnom sudu podnosi lice utvrđeno posebnim propisom Agencije.

Član 91.

Teži prekršaji lizing društva

Novčanom kaznom u iznosu od 5.000,00 do 20.000,00 KM kaznit će se za prekršaj lizing društvo koje:

- a) ne posluje u skladu sa članom 5a. ovog Zakona,
- b) obavlja djelatnost suprotno odredbama člana 7. ovog Zakona,
- c) stiče značajan vlasnički interes u drugom pravnom licu suprotno odredbama člana 11. ovog Zakona,
- d) ne postupi u skladu sa članom 15a. ovog Zakona,
- e) prilikom imenovanja člana uprave ne pribavi saglasnost Agencije u skladu sa članom 30. stav (3) ovog Zakona,
- f) ne posluje u skladu sa članom 32. ovog Zakona,
- g) ne postupa u skladu sa čl. 34. i 59. ovog Zakona,
- h) ne postupa u skladu sa članom 60. ovog Zakona,
- i) teže krši pravila o upravljanju rizicima iz člana 62. ovog Zakona,
- j) ne organizira poslovanje i vođenje poslovnih knjiga u skladu sa odredbama člana 63. ovog Zakona,
- k) prilikom imenovanja i angažiranja vanjskog revizora ne postupi u skladu sa odredbama člana 64. ovog Zakona,
- l) ne omogući ovlaštenim licima Agencije provođenje nadzora u skladu sa odredbama člana 74. ovog Zakona,
- m) ne dostavi izvještaj Agenciji u skladu sa odredbama člana 82. ovog Zakona.

Član 91a.

Lakši prekršaji lizing društva

Novčanom kaznom u iznosu od 2.000,00 do 7.000,00 KM kaznit će se za prekršaj lizing društvo ako:

- a) prilikom izbora članova nadzornog odbora postupi suprotno odredbama čl. 24. i 25. ovog Zakona,
- b) član uprave nije u radnom odnosu u skladu sa odredbom člana 29. stav (5) ovog Zakona,
- c) ne učini dostupnim informacije iz člana 33. ovog Zakona,
- d) ugovor o lizingu nije sastavljen u skladu s odredbama čl. 36. do 38. ovog Zakona,

- e) ne obavijesti dobavljača predmeta lizinga u skladu s odredbama člana 40. ovog Zakona,
- f) ne postupa u skladu sa članom 60a. ovog Zakona,
- g) ne postupa u skladu sa članom 60b. ovog Zakona,
- h) ne izvijesti Agenciju u skladu s odredbama člana 68. ovog Zakona,
- i) ne dostavi informacije Agenciji u skladu s odredbama člana 75. ovog Zakona,
- j) ne postupi u skladu sa članom 85. stav (4) ovog Zakona.

Član 92.

Prekršaji banaka

Novčanom kaznom u iznosu od 2.000,00 do 7.000,00 KM kaznit će se za prekršaj banka koja:

- a) ugovor o lizingu ne sastavlja u skladu sa odredbama čl. 36. i 37. ovog Zakona,
- b) ne obavijesti dobavljača predmeta lizinga u skladu sa odredbama člana 40. ovog Zakona.

Član 92a.

Prekršaji odgovornih lica u lizing društvu i banci

(1) Odgovorno lice u lizing društvu kaznit će se za prekršaje:

- a) iz člana 91. ovog Zakona, novčanom kaznom u iznosu od 1.500 do 5.000,00 KM
- b) iz člana 91a. ovog Zakona, novčanom kaznom u iznosu od 1.000 do 3.000,00 KM.

(2) Odgovorno lice u banci kaznit će se za prekršaje iz člana 92. ovog Zakona novčanom kaznom u iznosu od 1.000 do 3.000,00 KM.

Član 92b.

Korisnici lizinga (fizičko ili pravno lice)

(1) Novčanom kaznom u iznosu od 1.000,00 do 3.000,00 KM kaznit će se fizičko lice - korisnik lizinga koje je zaključio ugovor o lizingu sa pravnim licem registrovanim van teritorije BiH.

(2) Novčanom kaznom u iznosu od 2.000,00 do 7.000,00 KM kaznit će se pravno lice - korisnik lizinga koje je zaključilo ugovor o lizingu sa pravnim licem registrovanim van teritorije BiH.

(3) Novčanom kaznom u iznosu od 1.000,00 do 3.000,00 KM kaznit će se odgovorno lice u pravnom licu – korisniku lizinga za prekršaj iz stava (2) ovog člana."

Član 93.

Prekršaji ostalih lica

(1) Novčanom kaznom u iznosu od 1.500,00 do 5.000,00 KM kaznit će se za prekršaj fizičko lice ili pravno lice koje:

- a) obavlja poslove lizinga bez dozvole Agencije za obavljanje poslova lizinga,
- b) ne postupi u skladu sa članom 96. stav (3) ovog Zakona,
- c) stekne ili poveća značajan vlasnički interes u lizing društvu suprotno odredbama člana 9. ovog Zakona.

(2) Za prekršaje iz stava (1) ovog člana koje je počinilo pravno lice kaznit će se i odgovorno lice u pravnom licu kada je prekršaj učinjen, novčanom kaznom u iznosu od 1.000,00 do 3.000,00 KM.

Član 93a.

Prekršaji članova Uprave lizing društva i nadzornog odbora

(1) Novčanom kaznom u iznosu od 1.000,00 do 5.000,00 KM kaznit će se izvršni direktori - članovi Uprave lizing društva, ako ne vode poslove lizing društva iz svoje nadležnosti, u skladu sa članom 31. ovog Zakona.

(2) Novčanom kaznom u iznosu od 1.000,00 do 5.000,00 KM kaznit će se članovi Nadzornog odbora ako ne postupe u skladu sa članom 27. ovog Zakona.

Član 94.

Primjena odredbi Zakona o prekršajima

Na prekršaje u poslovima lizinga primjenjuju se odredbe Zakona o prekršajima, samo ako ovim Zakonom nije drugačije određeno.

DIO DESETI - PRIJELAZNE I ZAVRŠNE ODREDBE

Član 95.

Donošenje propisa

- (1) Agencija je dužna donijeti posebne propise predviđene ovim Zakonom u roku od šest mjeseci od dana stupanja na snagu ovog Zakona.
- (2) Propisi iz stava (1) ovog člana objavljuju se u "Službenim novinama Federacije BiH".

Član 96.

Usklađivanje sa odredbama ovog Zakona

- (1) Pravna lica koja na dan stupanja na snagu ovog Zakona obavljaju poslove lizinga i upisana su u sudski registar nastavljaju poslovati kao lizing društva prema ovom Zakonu.
- (2) Pravna lica iz stava (1) ovog člana dužna su u roku od 12 mjeseci od dana stupanja na snagu ovog Zakona uskladiti poslovanje prema odredbama ovog Zakona, odnosno od Agencije dobiti dozvolu za obavljanje poslova lizinga.
- (3) Ako pravna lica iz stava (1) ovog člana ne postupe u roku i na način predviđen odredbama ovog Zakona, dužna su prestati obavljati poslove lizinga i podnijeti prijavu za brisanje djelatnosti lizinga iz sudskog registra.
- (4) Ugovori o lizingu, kao i svi drugi ugovori koji imaju značaj finansiranja drugih lica sklopljeni do dana stupanja na snagu ovog Zakona ostaju na snazi do isteka obaveza iz tih ugovora.
- (5) Ugovori o lizingu zaključeni nakon stupanja na snagu ovog Zakona zaključuju se u skladu sa njegovim odredbama. Odredbe čl. 37. i 38. ovog Zakona primjenjuju se od dana stupanja na snagu posebnih propisa koje u skladu sa odredbama ovih članova donosi Agencija.

Član 97.

Stupanje na snagu

Ovaj Zakon stupa na snagu osmog dana od dana objavljivanja u "Službenim novinama Federacije BiH", a odredbe o nadzoru primjenjuju se od dana izdavanja dozvole za obavljanje poslova lizinga, a najkasnije po isteku 12 mjeseci od dana stupanja na snagu ovog Zakona.